

第五八四冊

理學彙編

經籍典

經學部

三
—
三
(卷)

古今圖書集成

中華書局影印



古今圖書集成

中華書局影印

欽定古今圖書集成理學彙編經籍典
第三百五十三卷目錄

經學部傳經名儒列傳二十七

元二

趙復

金履祥

陳櫟

胡炳文

蕭剡

侯均

第五居仁

胡長孺

胡之純

戴表元

鄭淵孫

陳孚

董朴

楊剛中

龍仁夫

程端禮

陸文圭

周仁榮

孟夢恂

程文

李孝光

伯顏

張璠

許謙

胡一桂

黃澤

韓擇

同恕

安熙

胡之綱

熊朋來

牟應龍

鄭陶孫

馮子振

楊載

劉詵

韓性

吳師道

梁益

周仔肩

陳旅

陳繹曾

宇文公諒

贈思

經籍典第三百五十三卷

經學部傳經名儒列傳二十七

元二

趙復

按元史儒學趙復傳復字仁甫德安人也太宗乙未歲命太子開出帥師伐宋德安以嘗逆戰其民數十萬皆俘戮無遺時楊惟中行中書省軍前姚樞奉詔即軍中求儒道釋醫士凡儒生掛俘籍者輒脫之以歸復在其中樞輿之言信奇士以九族俱殘不欲北因與樞訣樞恐其自裁置帳中共宿既覺月色皓然惟寢衣在遽馳馬周就積屍間無有也行及水際則見復已披髮徒跣仰天而號欲投水而未入樞曉以徒死無益汝存則子孫或可以傳緒百世隨吾而北必可無他復強從之先是南北道絕載籍不相通至是復以所記程朱所著諸經傳註盡錄以付樞自復至燕學子從者百餘人世祖在潛邸嘗召見問曰我欲取宋卿可導之乎對曰宋吾父母國也未有引他人以伐吾父母者世祖悅因不强之仕惟中聞復論議始嗜其學乃與樞謀建太極書院立周子祠以二程張楊游朱六君子配食選取遺書八千餘卷請復講授其中復以周程而後其書廣博學者未能貫通乃原義農堯舜所以繼天立極孔子顏孟所以垂世立教周程張朱氏所以發明紹續者作傳道圖而以書目條列於後別著伊洛發揮以標其宗旨朱子門人散在四方則以見諸登載與得諸傳聞者共五十有三人作師友圖以寓私淑之志又取伊尹顏淵言行作希賢錄使學者知所向慕然後求端用力之

方備矣樞既退隱蘇門乃即復傳其學由是許衡郝經劉因皆得其書而尊信之北方知有程朱之學自復始復爲人樂易而耿介雖居燕不忘故土與人交尤篤分誼元好問文名擅一時其南歸也復贈之言以博溺心未喪本爲戒以自修讀易求文王孔子之用心爲勉其愛人以德類如此復家江漢之上以江漢自號學者稱之曰江漢先生

張璠

按元史儒學張璠傳璠字達善其先蜀之導江人蜀亡僑寓江左金華王柏得朱熹三傳之學嘗講道於台之上蔡書院璠從而受業焉自六經語孟傳註以及周程張氏之微言朱子所嘗論定者靡不潛心翫索究極根柢用功既專久而不懈所學益弘深微密南北之士鮮能及之至元中行臺中丞吳曼慶聞其名延至江寧學宮俾子弟受業中州士大夫欲淑子弟以朱子四書者皆遣從璠遊或闢私塾迎之其在維揚來學者尤衆遠近翕然尊爲碩師不敢字呼而稱曰導江先生大亞薦諸朝特命爲孔顏孟三氏教授鄒魯之人服誦遺訓久而不忘璠氣宇端重音吐洪亮講說特精詳于弟從之者說說如也其高第弟子知名者甚多夾谷之奇楊剛中尤顯璠無子有經說及文集行世吳澄序其書以爲議論正援據博貫穿縱橫儼然新安朱氏之尸祝也至正中真州守臣以璠及郝經吳澄皆嘗當國儀真作祠字祀之曰三賢祠

金履祥

按元史儒學金履祥傳履祥字吉父婺之蘭谿人其

先本劉氏後避吳越錢武肅王嫌名更為金氏履祥從曾祖景文當宋建炎紹興間以孝行著稱其父母疾齋禱於天而靈應隨至事聞於朝為改所居鄉曰純孝履祥幼而敏磨父兄稍授之書即能記誦比長益自策勵凡天文地形禮樂田乘兵謀陰陽律曆之書靡不畢究及壯知向濂洛之學事同郡王柏從登何基之門基則學於黃幹而幹親承朱熹之傳者也自是講貫益密造詣益邃時宋之國事已不可為履祥遂絕意進取然負其經濟之略亦未忍遽忘斯世也會襄樊之師日急宋人坐視而不敢救履祥因進率制擒虛之策請以重兵由海道直趨燕薊則襄樊之師將不攻而自解且備叙海舶所經凡州郡縣邑下至巨洋別鴨難易遠近歷歷可據以行宋終莫能用及後朱瑄張清獻海運之利而所由海道視履祥先所上書咫尺無異者然後人服其精確德祐初以迪功郎史館編校起之辭弗就宋將敗物所在盜起履祥屏居金華山中兵燹稍息則上下巖谷追逐雲月寄情嘯詠視世故泊如也平居獨處終日儼然至與物接則盎然和惻訓迪後學諄切無倦而尤篤於分義有故人子坐事母子分配為謀不相知者十年履祥傾貲營購卒贖以先其子後貴履祥終不自言相見勞問辛苦而已何基王柏之喪履祥率其同門之士以義制服觀者始知師弟子之繫於常倫也履祥嘗謂司馬文正公光作資治通鑑祕書丞劉恕為外紀以記前事不本於經而信百家之說是非謬於聖人不足以傳信自帝堯以前不經夫子所定固野而難質夫子因魯史以作春秋王朝列國之事非有

玉帛之使則魯史不得而書非聖人筆削之所加也況左氏所記或闕或誣凡此類皆不得以辟經為辭乃用邵氏皇極經世曆胡氏皇王大紀之例損益折衷一以尚書為主下及詩禮春秋旁採舊史諸子表年繫事斷自唐堯以下接於通鑑之前勒為一書二十卷名曰通鑑前編凡所引書輒加訓釋以裁正其義多儒先所未發既成以授門人許謙曰二帝三王之盛其微言懿行宜後王所當法戰國申商之術其苛法亂政亦後王所當戒則是編不可以不著也他所著書曰大學章句疏義二卷論語孟子集註考證十七卷書表註四卷謙為益加校定皆傳於學者天曆初廉訪使鄭允中表上其書於朝初履祥既見王柏首問為學之方柏告以必先立志且舉先儒之言居敬以持其志立志以定其本志立乎事物之表敬行乎事物之內此為學之大方也及見何基基謂之曰會之屢言賢者之賢理欲之分便當自今始會之蓋柏字也當時議者以為基之清介純實似尹和靖柏之高明剛正似謝上蔡履祥則親得之二氏而並充於己者也履祥居仁山之下學者因稱為仁山先生大德中卒元統初里人吳師道為國子博士移書學官祠履祥於鄉學至正中賜諡文安

許謙

按元史儒學許謙傳謙字益之其先京兆人九世祖延壽宋刑部尚書八世祖仲容太子洗馬仲容之子曰洸曰洞洞由進士起家以文章政事知名於時洸之子實事海陵胡瑗能以師法終始者也由平江徙婺之金華至謙五世為金華人父觥登淳祐七年進

士第仕未顯以歿謙生數歲而孤甫能言世母陶氏口授孝經論語入耳輒不忘稍長肆力於學立程以自課取四部書分晝夜讀之雖疾恙不廢既乃受業金履祥之門履祥語之曰士之為學若五味之在和醢醬既加則酸鹹頓異子來見我已三日而猶夫人也豈吾之學無以感發子耶謙聞之惕然居數年盡得其所傳之奧於書無不讀窮探聖微雖殘文義語皆不敢忽有不可通則不敢強於先儒之說有所未安亦不苟同也讀四書章句集註有叢說二十卷謂學者曰學以聖人為準的然必得聖人之心而後可學聖人之事聖賢之心具在四書而四書之義備於朱子顧其辭約意廣讀者安可以易心求之乎讀詩集傳有名物鈔八卷正其音釋攷其名物度數以補先儒之未備仍存其逸義旁求遠援而以己意終之讀書集傳有叢說六卷其觀史有治忽殘微做史家年經國緯之法起太皞氏迄宋元祐元年秋九月尚書左僕射司馬光卒備其世數總其年歲原其興亡著其善惡蓋以為光卒則中國之治不可復興誠理亂之幾也故附於續經而書孔子卒之義以致其意焉又有自省編畫之所為夜必書之其不可書者則不為也其他若天文地理典章制度食貨刑法字學音韻醫經術數之說亦靡不該貫旁而釋老之言亦洞究其蘊嘗謂學者孰不曰關關端苟不深探其隱而識其所以然能辨其同異別其是非也幾希又嘗句讀九經儀禮及春秋三傳於其宏綱要領錯簡衍文悉別以鉛黃朱墨意有所明則表而見之其後吳師道購得呂祖謙點校儀禮視謙所定不同者十有

三條而已謙不喜矜露所爲詩文非扶翼經義張維世教則未嘗輕筆之書也延祐初謙居東陽入華山學者翕然從之尋開門講學遠而幽冀齊魯近而荆揚吳越皆不憚百舍來受業焉其教人也至誠諄悉內外殫盡嘗曰己有知使人亦知之豈不快哉或有

所問難而詞不能自達則爲之言其所欲言而解其所惑討論講貫終日不倦攝其粗疎入於密微聞者方傾耳聽受而其出愈真切情者作之銳者抑之拘者開之放者約之及門之士著錄者千餘人隨其材分咸有所得然獨不以科舉之文授人曰此義利之所由分也謙篤於孝友有絕人之行其處世不膠於古不流於俗不出里閭者四十年四方之士以不及門爲恥縉紳先生之過其鄉邦者必即其家存問焉或訪以典禮政事謙觀其會通而爲之折衷聞者厭服大德中楚惑入南斗句已而行謙以爲災在吳楚竊深憂之是歲大疫謙親加瘞或問曰豈食不足耶謙曰今公私匱竭道殣相望吾能獨飽邪其處心蓋如此廉訪使劉庭直副使趙宏偉皆中州雅望於謙深加推服論薦於朝中外名臣列其行義者前後章數十上而郡復以遺逸應詔鄉闈大比請司其文衡皆莫能致至其晚節獨以身任正學之重遠近學者以其身之安否爲斯道之隆替焉至元三年卒年六十八嘗以白雲山人自號世稱爲白雲先生朝廷賜諡文懿先是何基王柏及金履祥歿其學猶未大顯至謙而其道益著故學者推原統緒以爲朱熹之世適江浙行中書省爲請於朝建四賢書院以奉祀事而列於學宮同郡朱震亨字彥修謙之高第弟子也

其清修苦節絕類古篤行之士所至人多化之

陳樸

按元史儒學陳樸傳樸字壽翁徽之休寧人樸生三歲祖母吳氏口授孝經論語輒成誦五歲入小學即涉獵經史七歲通進士業十五鄉人皆師之宋亡科舉廢樸慨然發憤致力於聖人之學涵濡翫索貫穿古今嘗以謂有功於聖門者莫若朱熹氏熹沒未久而諸家之說往往亂其本真乃著四書發明書傳纂疏禮記集義等書亡慮數十萬言凡諸儒之說有畔於朱氏者刊而去之其微辭隱義則引而伸之而其所未備者復爲說以補其闕於是朱熹之說大明於世延祐初詔以科舉取士樸不欲就試有司強之試鄉闈中選遂不復赴禮部教授於家不出門戶者數十年性孝友尤剛正日用之間動中禮法與人交不以勢合不以利動善誘學者諄諄不倦臨川吳澄嘗稱樸有功於朱氏爲多凡江東人來受業於澄者盡遣而歸樸樸所居堂曰定宇學者因以定宇先生稱之元統二年卒年八十三揭傒斯誌其墓乃與吳澄並稱曰澄居通都大邑又數登用於朝天下學者四面而歸之故其道遠而章尊而明樸居萬山間與木石俱而足跡未嘗出鄉里故其學必待其書之行天下乃能知之及其行也亦莫之禦是謂豪傑之士矣世以爲知言

胡一桂

按元史儒學胡一桂傳一桂字庭芳徽州婺源人父方平一桂生而穎悟好讀書九精於易初饒州德興沈貴寶受易於董夢程夢程受朱熹之易於黃幹而

一桂之父方平及從貴寶夢程學嘗著易學啓蒙通釋一桂之學出於方平得朱熹氏源委之正朱景定甲子一桂年十八遂領鄉薦試禮部不第退而講學遠近師之號雙湖先生所著書有周易本義附錄纂疏本義啓蒙翼傳朱子詩傳附錄纂疏十七史纂並行於世

胡炳文

按元史胡一桂傳同郡胡炳文字仲虎亦以易名家作易本義通釋而於朱熹所著四書用力尤深餘干饒壽之學本出於朱熹而其爲說多與熹抵牾炳文深正其非作四書通凡辭異而理同者合而一之辭同而指異者析而辨之往往發其未盡之蘊東南學者因其所自號稱雲峰先生炳文嘗用薦者署明經書院山長再調蘭溪州學正

黃澤

按元史儒學黃澤傳澤字楚望其先長安人唐末舒藝知資州內江縣卒葬焉子孫遂爲資州人宋初延節爲大理評事兼監察御史累贈金紫光祿大夫澤十一世祖也五世祖拂與二兄播撰同年登進士第蜀人榮之父儀可累舉不第隨兄驥子官九江蜀亂不能歸因家焉澤生有異質慨然以明經學道爲志好爲苦思屢以成疾疾止復思久之如有所見作顏淵仰高鑽堅論蜀人治經必先古注疏澤於名物度數考覈精審而義理一宗程朱作易春秋二經解二禮祭祀述略大德中江西行省相臣聞其名授江州景星書院山長使食其祿以施教又爲山長於洪之東湖書院受學者益衆始澤嘗夢見夫子以爲適然

既而屢夢見之最後乃夢夫子手授所較六經字畫如新由是深有感發始悟所解經多徇舊說爲非是乃作思古吟十章極言聖人德容之盛上達於文王周公秩滿卽歸閉門授徒以養親不復言仕嘗以爲去聖久遠經籍殘闕傳注家率多傳會近世儒者又各以才識求之故議論雖多而經旨愈晦必積誠研精有所悟入然後可以窺見聖人之本真乃揭六經中疑義千有餘條以示學者既乃盡悟失傳之旨自言每於幽閒寂寞顛沛流離疾病無聊之際得之及其久也則豁然無不貫通自天地定位人物未生已前沿而下之凡遂古之初萬化之原載籍所不能具者皆略若發蒙如示諸掌然後由伏羲神農五帝三王以及春秋之末皆若身在其間而目擊其事者於是易春秋傳注之失詩書未決之疑周禮非聖人書之謗凡數十年苦思而未通者皆渙然冰釋各就條理故於易以明象爲先以因孔子之言上求文王周公之意爲主而其機括則盡在十翼作十翼舉要忘象辨象略辯同論於春秋以明書法爲主其大要則在考覈三傳以求向上之功而脈絡盡在左傳作三傳義例考筆制本旨又作元年春王正月辯諸侯娶女立于通考魯隱公不書卽位義殷周諸侯禘祫考周廟太廟單祭合食說作丘甲辯凡如是者十餘通以明古今禮俗不同見虛辭說經之無益嘗言學者必悟經旨廢失之由然後聖人本意可見若易象與春秋書法廢失大略相似苟通其一則可觸機而悟矣又懼學者得於創聞不復致思故所著多引而不發乃作易學濫觴春秋指要示人以求端用力之方

其於禮學則謂鄭氏深而未完王肅明而實淺作禮經復古正言如王肅混郊丘廢五天帝併崑崙神州爲一趙伯循言王者禘其始祖之所自出以始祖配之而不及羣廟之主胡宏家學不信周禮以社爲祭地之類皆引經以證其非其辯釋諸經要旨則有六經補注詆排百家異義則取杜牧不當言而言之義作翼經罪言近代覃思之學推爲第一吳澄嘗觀其書以爲平生所見明經士未有能及之者謂人曰能言距楊墨者聖人之徒也楚望真其人乎然澤雅自慎重宋嘗輕與人言李洞使過九江請北面稱弟子受一經且將經紀其家澤謝曰以君之才何經不可明然亦不過筆授其義而已若余則於艱苦之餘乃能有見吾非卻子不敢以二十年林下期君也洞歎息而去或問澤自闕如此寧無不傳之懼澤曰聖經典廢上關天運子以爲區區人力所致耶澤家甚饑貧且年老不復能教授經歲大祿家人采木實草根以療饑晏然會不動其意惟以聖人之心不明而經學失傳若己有罪爲大戚至正六年卒年八十七其書存於世者十二三門人惟新安趙訪爲高弟得其春秋之學爲多

蕭剡

按元史儒學蕭剡傳剡字惟斗其先北海人父仕秦中遂爲奉元人剡性至孝自爲兒時翹楚不凡稍出爲府史上官語不合卽引退讀書南山者三十年製一革衣由身半以下及臥輒倚其榻翫誦不少置於是博極羣書天文地理律曆算數靡不研究侯均謂元有天下百年惟蕭惟斗爲識字人學者及其門受

韓擇

按元史蕭剡傳韓擇字從善亦奉元人天資超異信道不惑其教學者雖中歲以後亦必使自小學等書始或疑爲陵節勤苦則曰人不知學白首童心且童蒙所當知而皓首不知可乎擇尤邃禮學有質問者口講指畫無倦容士大夫游宦過秦中必往見擇莫不虛往而實歸焉世祖嘗召之赴京疾不果行其卒也門人爲服總麻者百餘人

侯均

按元史蕭軒傳侯均字伯仁亦奉元人父母早亡獨與繼母居賣薪以給奉養積學四十年羣經百氏無不淹貫旁通釋老外典每讀書必熟誦乃已嘗言人讀書不至千遍終於己無益故其答諸生所問窮索極探如取諸篋笥名振關中學者宗之用薦者起為太常博士後以上疏忤時相意不待報可即歸休田里均貌魁梧而氣剛正人多嚴憚之及其應接之際則和易款洽雖方言古語世所未曉者莫不隨問而答世咸服其博聞

同恕

按元史儒學同恕傳恕字寬甫其先太原人五世祖遷秦中遂為奉元人祖昇父繼先博學能文廉希憲宣撫陝右辟掌庫館家世業儒同居二百口無間言恕安靜端凝羈絆如成人從鄉先生學日記數千言年十三以書經魁鄉校至元間朝廷始分六部選名士為吏屬關陝以恕貢禮曹辭不行仁宗踐阼即其家拜國子司業階儒林郎使三召不起陝西行臺侍御史趙世延請即奉元置魯齋書院中書奏恕領教事制可之先後來學者殆千數延祐設科再主鄉試人服其公六年以奉議大夫太子左贊善召入見東宮賜酒慰問繼而獻書歷陳古誼盡開悟涵養之道明年春英宗繼統以疾歸致和元年拜集賢侍讀學士以老疾辭恕之學由程朱上邁孔孟務貫決事理以利於行教人曲為開導使得趣向之正性整潔平居雖大暑不去冠帶母張夫人卒事異母如事所生父喪哀毀致目疾時祀齋肅詳至嘗曰養生有不備事猶可復追遠有不誠是誣神也可道罪乎與人交

雖外無適莫而中有繩尺里人借驛而死償其直不受曰物之數也何以償為家無擔石之儲而聚書數萬卷扁所居曰築菴時蕭軒居南山下亦以道高當世入城府必主恕家士論稱之曰蕭同恕自京還家居十三年縉紳望之若景星麟鳳鄉里稱為先生而不姓至順二年卒年七十八制贈翰林直學士封京兆郡侯諡文貞其所著曰築菴集三十卷

第五居仁

按元史儒學同恕傳恕第五居仁字士安幼師蕭軒弱冠從恕受學博通經史躬率子弟致力農畝而學徒滿門其宏度雅量能容人所不能容嘗行田間遇有竊其桑者居仁輒避之鄉里高其行義率多化服作字必楷整遊其門者不惟學明而行加修焉卒之日門人相與議易名之禮私諡之曰靜安先生

安熙

按元史儒學安熙傳熙字敬仲真定藁城人祖滔父松皆以學行淑其鄉人熙既承其家學及開保定割因之學心向慕焉熙家與因所居相去數百里因亦聞熙力於為己之學深許與之熙方將造其門而因已歿乃從因門人烏叔備問其緒說蓋自因得宋儒朱熹之書即尊信力行之故其教人必尊朱氏然因之為人高明堅勇其進莫遏熙則簡輒和易務為下學之功其告先聖文有曰追憶舊聞卒究前業灑掃應對謹行信言餘力學文窮理盡性循循有序發軔聖途以存諸心以行諸己以及於物以化於鄉其用功平實切密可謂善學朱氏者熙遭時承平不屑仕進家居教授垂數十年四方之來學者多所成就既

歿鄉人為立祠於藁城之西莞鎮其門人蘇天爵為輯其遺文而虞集序之曰使熙得見劉氏廓之以高明厲之以奮發則劉氏之學當益昌大於時矣

胡長孺

按元史儒學胡長孺傳長孺字汲仲婺州永康人當唐之季其先自天台來徙宋南渡後以進士科發身者十人持節分符先後相望會祖桌欽州司法參軍脫略豪雋輕賁急施人以鄭莊稱之祖最起嘉定甲戌進士知福州閩縣事卓行危論奇文瑰句端平嘉定間士大夫皆自以為不可及其在江西幕府平贛州之難於指顧之頃全活數十萬人父居仁淳祐丁未進士知台州軍州事文辭政事亦絕出於四方至長孺其學益大振九經諸史下逮百氏名墨縱橫旁行數落律令章程無不包羅而揆序之咸淳中外舅徐道隆為荆湖四川宣撫參議官長孺從之入蜀銓試第一名授迪功郎監重慶府酒務俄用制置使朱禔孫之辟兼總領湖廣軍馬錢糧所食廩與高彭李湜梅應春等號南中八士已而復拜福寧州倅之命會宋亡退棲永康山中至元二十五年詔下求賢有司強起之至京師待詔集賢院既而召見內殿拜集賢修撰與宰相議不合改教授揚州元貞元年移建昌道錄事闕官檄長孺攝之程文海方貴顯其家氣焰薰灼即違法人不敢呵問其樹外門侵官道長孺亟命撤之至大元年轉台州路寧海縣主簿階將仕佐郎大德丁未浙東大祲戊申復無麥民相枕死宣慰同知脫歡察議行振荒之令斂富人錢一百五十萬給之至縣以餘錢二十五萬屬長孺藏去乃行旁

州長孺察其有乾沒意悉散於民間月再至索其錢長孺抱成案進曰錢在是矣脫歡察怒曰汝膽如山耶何所受命而敢無忌若此長孺曰民一日不食當有死者誠不及以聞然官書具在可徵也脫歡察雖怒不敢問縣有銅巖惡少年狙伺其間恆出鈔道爲過客患官不能禁長孺僞衣商人服令蒼頭負貨以從陰戒騎卒十人躡其後長孺至巖中人突出要之長孺方遜辭以謝騎卒俄集皆成擒俾盡通其黨真於法夜行無虞民荷溺器糞田偶觸軍卒衣卒扶傷民且碎器而去竟不知主名民來訴長孺陽怒其誣械於市俾左右潛偵之向扶者過焉戟手稱快執詣所隸杖而償其器羣嫗聚浮屠庵誦佛書爲禳祈一嫗失其衣適長孺出鄉嫗訟之長孺以半麥寘羣嫗合掌中命繞佛誦書如初長孺閉目叩齒作集神狀且曰吾使神監之矣盜衣者行數周麥當芽一嫗屢開掌視長孺指縛之還所竊衣長孺白事帥府歸吏言有姦事屢問弗伏者長孺曰此易爾夜伏吏案下黎明出姦者訊之辭愈堅長孺伴謂令長曰頗聞國家有詔盡迎之叱隸卒縛姦者東西楹空縣而出庭無一人姦者相謂曰事至此死亦無承行將自解矣語畢案下吏嚙而出姦者驚咸叩頭服罪未嘉民有弟質珠步搖於兄者贖焉兄妻愛之給以亡於盜屢訟不獲直往告長孺長孺曰爾非吾民也叱之去未幾治盜長孺嗾盜誣兄受步搖爲賊逮兄赴官力辨數弗置長孺曰爾家信有何謂誣耶兄倉皇曰有固有之乃弟所質者趣持至驗之呼其弟示曰得非爾家物乎弟曰然遂歸焉其行事多類此不能盡

載延祐元年轉兩浙都轉運鹽使司長山場鹽司丞階將仕郎未上以病辭不復仕隱杭之虎林山以終長孺初師青田余學古學古師王夢松夢松亦青田人傳龍泉葉味道之學味道則朱熹弟子也淵源既正長孺益行四方訪求其旨趣始信涵養用敬爲最切默存靜觀超然自得故其爲人光明宏偉專務明本心之學慨然以孟子自許唯恐斯道之失其傳誘引不倦一時學者慕之有如飢渴之於食飲方獄大臣與郡二千石聘致庠序敷釋經義環聽者數百人長孺爲言人雖最靈與物同產初無二本皆躍躍然興起至有太息者爲辭章有精魄金春玉撞一發其和平之音海內來求者如購拱壁碑版焜煌照耀四裔苟非其人雖一金易一字毅然不與鄉閭取士屢司文衡貴賤賤華文風爲之一變晚寓武林病喘上氣者頗久一旦具酒食與比鄰別云將返故鄉門人有識其微意者問曰先生精神不衰何爲遽欲觀化乎長孺曰精神與死生初無相涉也就寢至夜半喘忽止其子駒排戶視之則正衣冠坐逝矣年七十五所著書有瓦缶編南昌集寧海漫抄顏樂齋彙行於世其從兄之綱之純皆以經術文學名

胡之綱

按元史儒學胡長孺傳之綱字仍仲嘗被薦書其於聲音字畫之說自言獨造其妙惜其書不傳

胡之純

按元史儒學胡長孺傳之純字穆仲咸淳甲戌進士踐履如古獨行者文尤明潔可誦人稱之爲三胡云熊朋來

按元史儒學熊朋來傳朋來字與可豫章人宋咸淳甲戌登進士第四人授從仕郎寶慶府簽書判官廳公事未上而宋亡世祖初得江南盡求宋之遺士而用之尤重進士以故相畱夢炎爲尚書召甲戌狀元王龍澤爲江南行臺監察御史朋來龍澤榜下進士而聲名不在龍澤下然不肯表襮荷進隱處州里間生徒受學者常百數十人取朱子小學書提其要領以示之學者家傳其書幾遍天下豫章爲江西會府行中書省提刑按察司皆在焉凡居是官者多朝廷名公卿皆以賓禮延見廉希憲之子惇爲參知政事以師禮事朋來終身稱門人劉宣爲提刑按察使尤加禮敬朋來和不肆介而不狃與羣賢講論經義無虛日儒者咸倚以爲重焉會朝廷遣治書侍御史王構銓外選於江西於是參政徐瑛李世安列薦朋來爲閩海提舉儒學官使者報聞而朝廷以東南儒學之士唯福建廬陵最盛特起朋來連爲兩郡教授所至考古篆籀文字調律呂協歌詩以興雅樂制器定辭必則古式學者化焉既滿考以常格調建安縣主簿不赴晚以福清州判官致仕朋來視之漠如也四方學者因其所自號稱爲天慵先生每燕居鼓瑟而歌以自樂嘗著瑟賦二篇學者爭傳誦之門人歸之者日盛旁近舍皆滿至不能容朋來懇懇爲說經旨文義老益不倦得其所指授者多爲問人延祐初詔以進士科取士時科舉廢已久有司咸不知其典故以不稱明詔是懼行省官主其事者諮問於朋來動中軌度因以申請四方得遵用之及請爲考試官則曰應試者十九及吾門不可其後江浙湖廣皆

卑詞致禮請爲主文朋來屢往應之及對大廷其所選士居天下三之一焉初朋來以周禮首薦鄉郡而元制周官不與設科治載記者又鮮朋來屢以爲言蓋朋來之學諸經中三禮尤深是以當世言禮學者咸推宗之至治中英宗始採用古禮親御袞冕祠太廟銳意於制禮作樂之事翰林學士元明善颺言於朝以朋來爲薦未及召而卒年七十八朋來動止有常喜怒不形於色接賓客人人各自以得其意有家集三十卷其大者明乎禮樂之事關於世教其餘若天文地理方技名物度數靡不精究子太古鄉貢進士

戴表元

按元史儒學戴表元傳表元字帥初一字曾伯慶元奉化州人七歲學古詩文多奇語稍長從里師習詞賦輒棄不肯爲咸淳中入太學以三舍法陞內舍生既而試禮部第十人登進士乙科教授建寧府後遷臨安教授行戶部掌故皆不就大德八年表元年已六十餘執政者薦於朝起家拜信州教授再調教授婺州以疾辭初表元閱宋季文章氣萎蕪而辭軌敝其弊已甚慨然以振起斯文爲己任時四明王應麟天台舒岳祥並以文章師表元表元皆從而受業焉故其學博而肆其文清深雅潔化陳腐爲神奇蓄而始發間事摹畫而隅角不露施於人者多尤自祕重不妄許與至元大德間東南以文章大家名重一時者唯表元而已其門人最知名者曰袁桷桷之文其體裁議論皆取法於表元者也表元晚年翰林集賢以修撰博士二職論薦而老疾不可起年六十七

卒有剡源集行於世當表元時有四明任士林者亦以文章知名云

牟應龍

按元史儒學牟應龍傳應龍字伯成其先蜀人後徙居吳與祖子才仕宋贈光祿大夫諡清忠父嘯爲大理少卿應龍幼警敏過人日記數千言文章有渾厚之氣應龍當以世賞補京官盡讓諸從弟而擢咸淳進士第時賈似道當國自擬伊周謂馬廷鸞曰君故與清忠游其孫幸見之當處以高第應龍拒之不見及對策具言上下內外之情不通國勢危急之狀考官不敢寘上第調光州定城尉應龍曰昔吾祖對策以直言忤史彌遠得洪雅尉今固當爾無媿也沿海制置司辟爲屬以疾辭不仕而宋亡矣故相留夢炎事世祖爲吏部尚書以書招之曰苟至翰林可得也應龍不答已而起家教授溧陽州晚以上元縣主簿致仕初宋亡時大理卿已退不任事一門父子自爲師友討論經學以義理相切磨於諸經皆有成說惟五經音攷盛行於世應龍爲文長於叙事時人求其文者車轍交於門以文章大家稱於東南人擬之爲眉山蘇氏父子而學者因應龍所自號稱之曰隆山先生泰定元年卒年七十八

鄭淵孫 鄭陶孫

按元史儒學鄭淵孫傳淵孫字景歐處州人宋景定間登進士第知溫州樂清縣累歷宗正丞禮部郎官至元三十年有以淵孫名薦者世祖召見授集賢直學士尋陞侍講學士又陞學士乞致仕歸田里鄭陶孫字景潛亦登進士第監西嶽祠先陶孫徵至

關奏對稱旨授翰林國史院編修官會纂修國史至宋德祐末年事陶孫曰臣嘗仕宋宋是年亡義不忍書書之非義矣終不書世祖嘉之陞應奉翰林文字後出爲江西儒學提舉淵孫兄弟在當時最號博洽儒學之士翕然推之隆福宮以其兄弟前朝士乃製衣親賜人以爲異遇焉淵孫所著有太易法象通贊周易記玩等書陶孫有文集若干卷

陳孚

按元史儒學陳孚傳孚字剛中台州臨海人幼清峻穎悟讀書過目輒成誦終身不忘至元中孚以布衣上大統賦江浙行省爲轉聞於朝署上蔡書院山長考滿調選京師二十九年世祖命梁曾以吏部尚書再使安南選南士爲介朝臣薦孚博學有氣節調翰林國史院編修官攝禮部郎中爲會同副使賜五品服佩金符以行三十年正月至安南世子陳日煚以憂制不出郊遣陪臣來迎又不由陽明中門入會與孚回館致書詰日煚以不廷之罪且責日煚當出郊迎詔及講新朝尚右之禮往復三書宣布天子威德辭直氣壯皆孚筆也其所贈孚悉卻之詳見梁會傳中使還除翰林待制兼國史院編修官帝方欲寬之要地而廷臣以孚南人且尚氣頗嫉忌之遂除建德路總管府治中再遷治中衢州所至多著善政秩滿復請爲鄉郡特授奉直大夫台州路總管府治中大德七年詔遣奉使宣撫循行諸道時台州旱民饑道殣相望江浙行省檄浙東元帥脫歡察兒發粟賑濟而脫歡察兒怙勢立威不卹民隱驅脅有司動宣重刑孚曰使吾民日至草死不救者脫歡察兒也遂

詣宣撫使懇其不法蠹民事一十九條宣撫使按實坐其罪命有司亟發倉賑饑民賴以全活者衆而孚亦以此致疾卒於家年六十四孚天材過人性任俠不羈其爲詩文大抵任意即成不事雕斲有文集行於世子邁江浙行省左右司員外郎致仕女長媽適葉城董士楷太常禮儀院太祝宗緝之母也末媽適同里韓戒之行樞密院經歷諫之母也俱有貞節朝廷旌表其門閭

馮子振

按元史儒學陳孚傳攸州馮子振其豪俊與孚略同孚極敬畏之自以爲不可及子振於天下之書無所不記當其爲文也酒酣耳熱命侍史二三人潤筆以俟子振據案疾書隨紙數多寡頃刻輒盡雖事料醜郁美如簇錦律之法度未免乖刺人亦以此少之

董朴

按元史儒學董朴傳朴字太初順德人自幼強記比冠師事榮舜咨劉道濟幡然有求道之志至元十六年用提刑按察使薦起家爲陝西知法官未幾以親老歸養尋召爲太史院主事復辭不赴皇慶初朴年已踰八十詔以翰林修撰致仕延祐三年無疾而終年八十有五朴所爲學自六經及孔孟微言與凡先儒所以開端闡幽者莫不研極其旨而會通之故其心所自得往往有融貫之妙其事親孝與人交智愚貴賤一待以誠或有犯之者夷然不與之校中山王結曰朴之學造詣既深充養交至其爲人清而通和而介君子人也朴家龍岡學者因稱之曰龍岡先生云

楊載

按元史儒學楊載傳載字仲弘其先居建之浦城後徙杭因爲杭人少孤博涉羣書爲文有跌宕氣年四十不仕戶部買國英數薦於朝以布衣召爲翰林國史院編修官與修武宗實錄調管領係官海船萬戶府照磨兼提控案牘延祐初仁宗以科目取士載首應詔遂登進士第授承務郎饒州路同知浮梁州事遷儒林郎寧國路總管府推官以辛卯吳興趙孟頫在翰林得載所爲文極推重之由是載之文名隱然動京師凡所撰述人多傳誦之其文章一以氣爲主博而敏直而不肆自成一家言而於詩文尤有法嘗語學者曰詩當取材於漢魏而音節則以唐爲宗自其詩出一洗宋季之陋

楊剛中

按元史儒學楊載傳建康之上元有楊剛中字志行自幼厲志操及爲江東憲府照磨風采凜凜有足稱者其爲文奇奧簡澀動法古人而不屑爲世俗平凡語元明善極嘆異之仕至翰林特制而卒有霜月集行於世其甥李桓字晉仲同郡人由鄉貢進士累遷江浙儒學副提舉亦以文鳴江東紆餘豐潤學者多傳之載與剛中同輩行而桓則稍後云

劉詵

按元史儒學劉詵傳詵字桂翁吉安之廬陵人性穎悟幼失父知自樹立年十二作爲科場律賦論策之文蔚然有老成氣象宋之遺老鉅公一見卽以斯文之任期之既冠軍厚醇雅素以師道自居教學者有法聲譽日隆江南行御史臺屢以教官館職遺薦

皆不報詵爲文根柢六經凌躐諸子百家融液今古而不露其踔厲風發之狀四方求文者日至於門其所爲詩文曰桂隱集桂隱詵所號也至正十年卒年八十三

龍仁夫

按元史儒學劉詵傳同郡龍仁夫字觀復劉岳申字高仲其文學皆與詵齊各有集行世而仁夫之文尤奇逸流麗所著周易多發前儒之所未發岳申用薦者爲遼陽儒學副提舉仁夫江浙儒學副提舉皆不就

韓性

按元史儒學韓性傳性字明善紹興人其先家安陽宋司徒兼侍中魏忠獻王琦其八世祖也高祖左司郎中膺胄扈從南渡家於越性天資警敏七歲讀書數行俱下日記萬言九歲通小戴禮作大義操筆立就文意蒼古老生宿儒皆稱異焉及長博綜羣籍自經史至諸子百氏靡不極其津涯究其根柢而於儒先性理之說尤深造其闡域其爲文辭博達雋偉變化不測自成一家言四方學者受業其門戶外之屢至無所容延祐初詔以科舉取士學者多以文法爲請性語之曰今之貢舉悉本朱熹私議爲貢舉之文不知朱氏之學可乎四書六經千載不傳之學自程氏至朱氏發明無餘蘊矣顧行何如耳有德者必有言施之場屋直其末事豈有他法哉凡經其口授指畫不爲甚高論而義理自勝不期文之工而不能不工以應有司之求亦未始不合其繩尺也士有一善必爲之延譽不已及辯析是非則毅然有不可犯之

色性出無與馬僕御所過負者息肩行者避道巷夫街叟至於童穉斯役咸稱之曰韓先生韓先生云憲府嘗舉爲教官謝曰幸有先人之敝廬可庇風雨薄田可具饘粥讀書祗行無愧古人足矣祿仕非所願也受而不赴暮年愈自韜晦然未嘗忘情於斯世郡之良二千石政事有所未達輒往咨訪性從容開導洞中肯綮裨益者多天曆中趙世延以性名上聞後十年門人李齊爲南臺監察御史力舉其行義而性已卒矣年七十有六卒後南臺御史中丞月魯不花嘗學於性言性法當得諡朝廷賜諡莊節先生其所著有禮記說四卷詩音釋一卷書辯疑一卷郡志八卷文集十二卷

程端禮 瑞學

按元史儒學韓性傳當性時慶元有程端禮端學兄弟者端禮字敬叔幼穎悟純篤十五歲能記誦六經曉析大義慶元自宋季皆尊尚陸九淵氏之學而朱熹氏學不行於慶元端禮獨從史蒙卿游以傳朱氏明體達用之指學者及門甚衆所著有讀書工程國子監以頒示郡邑校官爲學者式仕爲衢州路儒學教授卒年七十五端學字時叔通春秋登至治辛酉進士第授僊居縣丞尋改國子監助教勳有師法學者以其剛嚴方正咸嚴憚之遷太常博士命未下而卒後以子徐貴贈禮部尚書所著有春秋本義三十卷三傳辯疑二十卷春秋或問十卷

吳師道

按元史儒學吳師道傳師道字正傳婺州蘭谿人自羈州卽知學善記覽工詞章才思涌溢發爲歌詩清

麗俊逸弱冠因讀宋儒真德秀遺書乃幡然有志於爲己之學刮磨淬礪日長月益嘗以持敬致和之說質於同郡許謙謙復之以理一分殊之旨由是心志益廣造履益深大抵務在發揮義理而以闢異端爲先務登至治元年進士第授高郵縣丞明達文法吏不敢欺再調寧國路錄事會歲大旱饑民仰食於官者三十三萬口師道勸大家得粟三萬七千六百石以賑饑民又言於部使者轉聞於朝得粟四萬石鈔三萬八千四百錠賑之三十餘萬人賴以存活遷池州建德縣尹郡學有田七百畝爲豪民所占郡下其事建德俾師道究治之卽爲按其圖籍悉以歸於學建德素少茶而權稅九重民以爲病卽爲極言於所司權稅爲減中書左丞呂思誠侍御史孔思立列薦之召爲國子助教尋陞博士其爲教一本朱熹之旨而遵許衡之成法六館諸生人人自以爲得師丁內憂而歸以奉議大夫禮部郎中致仕終於家所著有易詩書雜說春秋胡傳附辯戰國策校註敬鄉錄及文集二十卷師道同郡又有王餘慶字叔善仕爲江南行臺監察御史亦以儒學名重當世云

陸文圭

按元史儒學陸文圭傳文圭字子方江陰人幼而穎悟讀書過目成誦終身不忘博通經史百家及天文地理律曆醫藥算數之學宋咸淳初文圭年十八以春秋中鄉選宋亡隱居城東學者稱之曰牆東先生延祐設科有司強之就試凡一再中鄉舉文圭爲文融會經傳縱橫變化莫測其涯際東南學者皆宗師之朝廷數遣使馳幣聘之以老疾不果行卒年八十

五文圭爲人剛明超邁以奇氣自負於地理考覈其詳凡天下郡縣沿革人物土產悉能默記如指諸掌先屬續一日語門人曰以數考之吾州二十年後必有兵變慘於五代建炎吾死當葬不食之地勿封勿樹使人不知吾墓庶無暴骨之患其後江陰之亂冢墓盡發人乃服其先知有牆東類藁二十卷

梁益

按元史儒學陸文圭傳同里有梁益者字友直其先福州人博洽經史而工於文辭其教人以變化氣質爲先務學徒不遠千里從之自文圭既卒浙以西稱學術醇正爲世師表者惟益而已益所著書有三山藁詩緒餘史傳姓氏纂又有詩傳旁通發揮朱熹氏之學爲精年五十六卒

周仁榮

按元史儒學周仁榮傳仁榮字本心台州臨海人父敬孫宋太學生初金華王柏以朱熹之學主台之上蔡書院敬孫與同郡楊珏陳天瑞車若水黃超然朱致中薛松年師事之受性理之旨敬孫嘗著易象占尚書補遺春秋類例仁榮承其家學又師珏天瑞治易禮春秋而工爲文章用薦者署美化書院山長美化在處州萬山中人鮮知學仁榮舉行鄉飲酒禮十俗爲變後辟江浙行省掾史省臣皆呼先生不以吏遇之泰定初召拜國子博士遷翰林修撰陞集賢待制奉旨代祀嶽瀆至會稽以疾作不復還朝卒年六十有一其所教弟子多爲名人而泰不華實爲進士第一

周仔肩

按元史儒學周仁榮傳仁榮弟仔肩字本道以春秋登延祐五年進士第終奉議大夫惠州路總管府判官與其兄俱以文學名

孟夢恂

按元史儒學周仁榮傳同郡有孟夢恂者字長文黃巖人與仁榮同師事楊廷陳天瑞夢恂講解經旨體認精切務見行事四方游從者皆服焉部使者薦其行義署本郡學錄至正十三年以設策禦寇救鄉郡有功授登仕郎常州路宜興州判官未受命而卒年七十四朝廷賜諡號曰康靖先生所著有性理本旨四書辨疑漢唐會要七政疑解及筆海雜錄五十卷

陳旅

按元史儒學陳旅傳旅字衆仲興化莆田人先世素以儒學稱旅幼孤資稟穎異其外父趙氏學有源委撫而教之旅得所依不以生業爲務惟篤志於學於書無所不讀稍長負笈至溫陵從鄉先生傳古直游聲名日著用薦者爲閩海儒學官適御史中丞馬雍古祖常使泉南一見奇之謂旅曰子館閣器也胡爲留滯於此因相勉遊京師既至翰林侍講學士虞集見其所爲文慨然歎曰此所謂我老將休付子斯文者矣即延至館中朝夕以道義學問相講習自謂得旅之助爲多與祖常交口游譽於諸公間咸以旅爲博學多聞宜居師範之選中書平章政事趙世延又力薦之除國子助教居三年考滿諸生不忍其去請於朝再任焉元統二年出爲江浙儒學副提舉至元四年入爲應奉翰林文字至正元年遷國子監丞階文林郎又二年卒年五十有六旅於文自先秦以

來至唐宋諸大家無所不究故其文典雅峻潔必求合於古作者不徒以徇世好而已有文集十四卷旅平生於師友之義尤篤每感虞集爲知己其在浙江時集歸田已數載歲且大比請於行省參知政事李木魯神親奉書幣請集主文鄉闈欲爲問候計乃衝冒炎暑千里訪集於臨川集感其來留旬日而別倦倦以斯文相勉慘然若將永訣焉集每與學者語必以旅爲平生益友也一日夢旅舉杯相向曰旅甚思公亦知公之不忘旅也但不得見爾既而聞旅卒集深悼之

程文 陳繹曾

按元史儒學陳旅傳同時有程文陳繹曾者皆名士文字以文徵州人仕至禮部員外郎作文明潔而精深集亦多稱之繹曾字伯敷處州人爲人雖口吃而精敏異常諸經註疏多能成誦文辭汪洋博其氣煜如也官至國子助教論者謂二人皆與旅相伯仲云

李孝光

按元史儒學李孝光傳孝光字季和溫州樂清人少博學篤志復古隱居鴈蕩山五峯下四方之士遠來授學名譽日聞泰不華以師事之南行臺監察御史閻辭屢薦居館閣至正七年詔徵隱士以秘書監著作郎召與完者圖執禮哈琅董立同應詔赴京師見帝於宣文閣進孝經圖說帝大悅賜上尊明年陞文林郎祕書監丞卒於官年五十三孝光以文章負名當世其文一取法古人而不趨世尚非先秦兩漢語弗以措辭有文集二十卷

宇文公諒

按元史儒學宇文公諒傳公諒字子貞其先成都人父挺祖徙吳興今爲吳興人公諒通經史百氏言弱冠有操行嘉興富民延爲子弟師夜將半聞有叩門者問之乃一婦人公諒厲身叱去之翌日即以他事辭歸終不告以其故至順四年登進士第授徽州路同知婺源州事丁內艱改同知餘姚州事夏不雨公諒出禱輒應歲以有年民頌之以爲別駕兩攝會稽縣申明冤滯所活者衆省檄察實松江海塗田公諒以潮汐不常後必貽患請一免免科省臣從之遷高郵府推官未幾授國子助教日與諸生辯析諸經六館之士資其陶甄者往往出爲名臣調應奉翰林文字同知制誥兼國史院編修官以病得告後召爲國子監丞除江浙儒學提舉改食嶺南廉訪司事以疾請老公諒平居雖暗室必整衣冠端坐嘗挾手記一冊識其編首曰晝有所爲暮則書之其不可書即不敢爲天地鬼神實聞斯言其檢飭之嚴如此所著述有折桂集觀光集辟水集以齋詩藥玉堂漫藁越中行藁凡若干卷門人私謚曰純節先生

伯顏

按元史儒學伯顏傳伯顏一名師聖字宗道哈刺魯氏隸軍籍蒙古萬戶府世居開州濮陽縣伯顏生三歲常以指畫地或三或六若爲卦者六歲從里儒授孝經論語即成誦蚤喪父其兄曲出買經傳等書以資之日夜誦不輟稍長受業宋進士建安黃坦坦曰此子穎悟過人非諸生可比因命以顏爲氏且名而字之爲久之坦辭曰余不能爲爾師羣經有朱子說

具在歸而求之可也伯顏自弱冠即以斯文爲己任其於大經大法粲然有觀而心所自得每出於言意之表鄉之學者來相質難隨問隨辨咸解其惑於是中原之士聞而從游者日益衆至正四年以隱士徵至京師授翰林待制預修金史既畢辭歸已而復起爲江西廉訪食事數月以病免及還四方之來學者至千餘人蓋其爲學專事講解而務真知力踐不屑事舉子詞章而必期措諸實用士出其門不問知其爲伯顏氏學者至於異端之徒亦往往棄其學而學焉十八年河南賊蔓延河北伯顏言於省臣將結其鄉民爲什伍以自保而賊兵大至伯顏乃渡漳北行邦人從之者數十萬家至磁與賊遇賊知伯顏名士生刼之以見賊將誘以富貴伯顏罵不屈引頸受刃與妻子俱死之年六十有四既死人或剖其腹見其心數孔曰古稱聖人心有七竅此非賢士乎乃納心其腹中覆牆而掩之有司上其事贈奉議大夫食太常禮儀院事諡文節太常諡議曰以城守論之伯顏無城守之責而死可與江州守李黼一律以風紀論之伯顏無在官之責而死可與西臺御史張桓並駕以平生有用之學成臨義不奪之節乃古之所謂君子人者時以爲確論伯顏平生修輯六經多所著述皆燬於兵

贈思

按元史儒學贈思傳贈思字得之其先大食國人國既內附大父魯坤乃東遷豐州太宗時以材授真定濟南等路監權課稅使因家真定父幹直始從儒先生問學輕財重義不干仕進贈思生九歲日記古經

傳至千言比弱冠以所業就正於翰林學士承旨王忠廉之門由是博極羣籍汪洋茂衍見諸踐履皆篤實之學故其年雖少已爲鄉邦所推重延祐初詔以科第取士有勸其就試者贈思笑而不應既而侍御史郭思貞翰林學士承旨劉廣參知政事王士熙交章論薦之泰定三年詔以遺逸徵至上都見帝於龍虎臺眷遇優渥時刺沙柄國西域人多附焉贈思獨不往見倒刺沙屢使人招致之即以養親辭歸天曆三年召入爲應奉翰林文字賜對奎章閣文宗問曰卿有所著述否明日進所著帝王心法文宗稱善詔預修經世大典以論議不合求去命奎章閣侍書學士虞集論留之贈思堅以母老辭遂賜幣遣之復命集傳旨曰卿且暫還行召卿矣至順四年除國子博士丁內艱不赴後至元二年拜陝西行臺監察御史上封事十條曰法祖宗攬權綱敦宗室禮勳舊惜名器開言路復科舉罷數軍一刑章寬禁網時姦臣變亂成憲帝方虛己以聽贈思所言皆一時羣臣所不敢言者侍御史趙承慶見之嘆曰御史言及此天下福也咸里有執政陝西行省者恣爲非道贈思發其罪而按之輒棄職夜遁會有詔勿逮問然猶杖其私人及分巡雲南按省臣之不法者其人即解印以去遠藩爲之震悚襄漢流民聚居宋之紹熙府故地至數千戶私開鹽井自相部署往往劫囚徒殺巡卒贈思乃擒其魁而釋其黨復上言紹熙土饒利厚流戶日增若以其人散還本籍恐爲邊患宜設官府以撫定之詔即其地置紹熙撫司三年除食浙西肅政廉訪司事即按問都轉運鹽使海道都萬戶行宣

政院等官賊罪浙右郡縣無敢爲貪墨者復以浙右諸僧寺私蔽猾民有所謂道人道民行童者皆潰常倫隱徭役使民力日耗契勘嘉興一路爲數已二千七百乃建議請勒歸本族俾供王賦庶以少寬民力朝廷是之即著以爲令四年改食浙東肅政廉訪司事以病免歸贈思歷官臺憲所至以理冤澤物爲己任平反大辟之獄先後甚衆然未嘗故出人罪以市私恩嘗與五府官決獄咸寧有婦朱娥者與鄰人通鄰人謂娥曰我將殺而夫娥曰張子文行且殺之明日夫果死跡盜數日娥始以張子文告其姑五府官以爲非共殺且經赦有宜釋之贈思曰張子文以爲娥固許之矣且娥夫死及旬乃始言之是娥與張同謀度不能終隱故發之也豈赦可釋哉樞密判官曰平反活人陰德也御史勿執常法贈思曰是謂故出人罪非平反也且公欲種陰德於生者奈死者何乃獨上議刑部卒正娥罪其審刑當罪多類此至正四年除江東肅政廉訪副使十年召爲祕書少監議治河事皆辭疾不赴十一年卒於家年七十有四二十五年皇太子撫軍冀寧承制封拜贈嘉議大夫禮部尚書上輕車都尉追封恆山郡侯諡曰文孝贈思遂於經而易學尤深至於天文地理鍾律算數水利旁及外國之書皆究極之家貧餽粥或不繼其考訂經傳常自樂也所著述有四書闕疑五經思問奇偶陰陽消息圖老莊精詣鎮陽風土記續東陽志重訂河防通議西國圖經西域異人傳金京宗記正大諸臣列傳審聽要訣及文集三十卷藏於家

欽定古今圖書集成理學彙編經籍典

第三百五十四卷目錄

經學部傳經名儒列傳二十八

明一

宋濂

詹同

劉仲質

劉三吾

張以寧

趙倣

桂彥良

程徐

解縉

金幼孜

楊榮

陳敬宗

羅倫

羅洪先

王鏊

王廷相

王艮

顧憲成

高攀龍

陶安

朱升

魏觀

朱善

石光霽

錢宰

錢唐

方孝孺

胡廣

楊士奇

李時勉

薛瑄

舒芬

丘濬

何喬新

王守仁

唐順之

錢一本

經籍典第三百五十四卷

經學部傳經名儒列傳二十八

明一

宋濂

按明外史宋濂傳濂字景濂其先金華之潛溪人至濂乃遷浦江幼英敏善記有鄉先生延見之抽架上雜書俾記五百言濂以指按行按畢成誦鄉先生大驚攜就學于聞人夢吉所逼五經其友胡翰曰舉子業不足混景濂濂學古文辭乎乃往就吳萊學已游柳貫黃潛之門兩人皆大儒亟遜濂自謂弗如元至正中薦授翰林編修辭不行入龍門山中著書踰十年太祖取婺州召見濂還金陵復有以劉基章溢葉琛薦者乃使使以書幣徵濂等四人濂歎曰吾聞大亂極而真人出斯其時矣遂與基等俱入見除江南儒學提舉兼命授皇太子經尋改起居注濂長基一歲皆起東南負重名基雄邁有奇氣而濂自命為儒者俱被徵基遂佐軍中謀議濂亦首用文學受知恆侍左右備顧問嘗召講春秋左氏傳濂進曰春秋乃孔子褒善貶惡之書苟能遵行則賞罰適中天下可定也太祖御端門口釋黃石公三略濂進曰尚書二典三謨帝王大經大法畢具願留意講明之已論實資復曰得天下以人心為本人心不固雖金玉充牣將焉用之太祖悉稱善久之以疾告歸太祖與太子並加勞賜濂上箋謝并奉書太子勉以孝友敬恭進德修業以副天下之望太祖覽書大悅召太子為語書意賜札褒答焉洪武二年召充元史總裁官除翰林院學士知制誥兼修國史其明年以失朝參降編

修四年遷國子司業坐議孔廟祀典忤旨謫安遠知縣旋召為禮部主事明年遷贊善大夫皇太子一言動濂皆以禮法諷諭使歸于道至有關政教及前代興亡事必拱手曰當如是不當如彼皇太子每斂容嘉納言必稱師父云帝剖符封功臣名濂議五等封爵宿大本堂討論達旦歷據漢唐故實量其中而奏之甘露屢降帝問災祥之故對曰受命不干天于其人休符不干祥于其仁春秋書異不書祥為是故也皇從子文正得罪進曰文正固當死陛下體親親之誼置諸遠地則善矣車駕祀方丘患心不寧濂從容言曰養心莫善于寡欲審能行之則心清而身泰矣帝稱善者良久嘗問以帝王之學何書為要濂舉大學衍義乃命大書揭之殿兩廡壁頂之御西廡諸大臣皆在帝指衍義中司馬遷論黃老革命濂講畢因曰漢武溺方技繆悠之學改文景恭儉之風民力既敝然後嚴刑督之人主誠以禮義治心則邪說不入以學校治民則禍亂不興刑罰非所先也問三代歷數及封疆廣狹既備陳之復曰三代治天下以仁義故多歷年所又問三代以上所讀何書對曰上古載籍未立人不專講誦君人者兼治教之責率以躬行則衆自化嘗奉制詠鷹令七舉足即成有自古戒禽荒之言帝忻然曰卿可謂善陳矣濂之隨事納忠皆此類也六年擢侍講學士同修國史兼贊善大夫欲使參大政辭曰臣少無他長待罪禁近足矣帝益重之濂性誠謹官內庭久未嘗訐人過所居室署曰溫樹客問禁中語即指示之嘗與客飲帝密使人偵視翌日問濂昨飲酒否坐客為誰饌何物濂具以實

對帝笑曰誠然卿不朕欺問名問羣臣臧否惟舉其善者曰善者與臣友臣知之其不善者不能知也主事茹太素上書萬餘言帝怒問廷臣或指其書曰此不敬此誹謗非法問濂對曰彼盡忠于陛下耳陛下

方開言路惡可深罪既而帝覽其書有足採者悉召廷臣詰責因字呼濂曰微景濂幾誤罪言者于是帝廷譽之曰朕聞太上為聖其次為賢其次為君子朱景濂事朕十九年未嘗有一言之僞諂一人之短始終無二非止君子抑可謂賢矣每燕見必設坐命茶每旦必令侍膳往復咨詢常夜分乃罷濂不能飲帝嘗強之至三觴行不成步帝大懼樂御製楚詞一章命詞臣賦醉學士詩又嘗調甘露于湯手酌以飲濂曰此能愈疾延年願與卿共之又詔太子賜濂良馬復為製白馬歌一章亦命侍臣和焉其寵待如此九年進學士承旨典國史制誥如故其明年致仕賜綺帛問濂年幾何曰六十有八帝乃曰藏此綺三十二年作百歲衣可也濂頓首謝又明年來朝十三年以長孫慎獲罪帝欲置濂死皇后太子力救乃安置茂州濂狀貌豐偉美鬚髯近視而明一黍上能作數字自少至老未嘗一日去書卷于學無所不通為文醇深演迤與古作者並在朝郊社宗廟山川百神之典朝會宴享律曆衣冠之制四裔貢賦賞勞之儀旁及元勛巨卿碑記刻石之辭天子悉以委濂屢推為開國文臣之首士大夫造門乞文者後先相踵外國貢使亦知其名數問宋先生起居無恙否高麗安南日本至出兼金購文集四方學者悉稱為太史公不以姓氏雖白首侍從其勲業爵位不逮基而一代禮樂

制作濂所裁定者居多其明年卒于薨年七十二弘治九年四川巡撫馬俊奏濂真儒翔運迹作可師黼黻多功輔導著蹟久死遠茂幽壤沉淪乞加卹錄下禮部議復其官春秋祭葬所正德中追諡文憲

陶安

按明外史陶安傳安字主敬當塗人少敏悟有大志博涉經史從者儒李習淵元至正初舉江浙鄉試授明道書院山長避亂家居太祖取太平安與習率父老出迎安謂習曰龍姿鳳質非常人也吾輩今有主矣太祖召與語安進曰海內鼎沸豪杰並爭率攻城屠邑掠子女玉帛非有撥亂救民安天下心明公渡江神武不殺人心悅服應天順人以行弔伐天下不足平也太祖曰善吾欲取金陵何如安曰金陵古帝王都取而有之撫形勝以臨四方何向不克太祖又曰善雷參幕府授左司員外郎授習太平知府習字伯羽年八十餘矣卒于官安從克集慶進郎中太祖得劉基宋濂章溢葉琛問安四人者何如對曰臣謀略不如劉基學問不如宋濂治民之才不如溢琛太祖多其能讓後克黃州思得重臣鎮之曰無逾安者遂命知黃州寬租省徭民以樂業坐事謫知桐城起知饒州陳友定兵攻城督吏人拒守援兵至敗去諸將欲盡屠從寇者安曰民為所脅奈何殺之不許太祖嘉安功賜詩褒美州民建生祠事之吳元年初置翰林首名安為學士時徵四方宿儒議禮命安為總裁官與宰臣條上郊社宗廟議帝悉從之已又為議律官與李善長劉基周楨滕毅等刪定律令洪武元年命知制誥兼修國史帝御東閣安與章溢等侍命

安論前代興亡本末安言喪亂之原由于驕侈帝曰居高位者易驕處快樂者易侈驕則善言不入而過不聞侈則善道不立而行不顧如此者未有不亡卿言甚當又嘗論學術安曰道不明邪說害之也帝曰邪說害道猶美味之悅口美色之眩目邪說不去則正道不興天下何從治安頓首曰陛下所言可謂深探其本矣安事帝十餘歲視諸儒最舊及官侍從寵愈渥御製門帖子以賜時人榮之御史或言安隱過帝詰曰安寧有此且若何從知曰聞之道路帝大怒立黜之中書省臣進曰御史職當言言即有失宜寬假帝卒不聽既又命安為江西行省參知政事論曰朕渡江初卿首謁軍門數陳王道及參幕府裨益良多繼入翰林益聞議論江西上游地撫綏莫如卿安辭帝不許至江西政績益著其年卒于官疾劇草上時務十二事帝親為文以祭追封姑孰郡公安所學尤長于易筮驗若神方國初之議諸禮也宋濂以外艱家居其儀率安裁定大祀禮專用安議給禘禮用詹同齋戒禮朱升五祀禮崔亮朝會禮劉基祝祭禮魏觀軍禮陶凱後復有改易語在禮樂志追諡文憲

詹同

按明外史詹同傳同字同文初名書婺源人幼穎異受易于甘楚材受春秋于劉彭壽二人皆元季名士學由此大進虞集見之曰才子也以其弟榮子妻之至正中舉茂才異等除郴州學正遇亂家黃州仕陳友諒為翰林學士承旨兼御史太祖下武昌召為國子博士易名同時功臣子弟教習內府諸博士治一經不盡通同淹貫羣籍講易春秋最善應教為文才

思泉湧太祖善之遷考功郎中直起居注論曰史貴直筆唐太宗命直書建成事以公天下予言行汝當直書俾後世徵實同再拜受旨洪武元年與侍御史文原吉起居注魏觀等循行天下訪求賢才還進翰林直學士稍遷侍讀學士帝御下峻御史中丞劉基曰古者公卿有罪盤水加劍詣請室自裁所以勵廉恥存國體也同侍側取戴記及賈誼疏以進因劄切言之帝謂同聲色之害甚于鴆毒前代率以此敗亡創業垂統之君為子孫所承式尤不可不謹同因舉

成湯不遇聲色垂裕後昆以對其納誨多類此四年進吏部尚書六年為學士承旨兼吏部尚書同雖任吏部國家文章制作之事仍屬裁定為承旨復與學士樂韶鳳定釋奠先師樂章又上章言陛下渡江已來征討平定之蹟禮樂治道之詳雖有紀載尚未成書乞編日曆以傳後世帝從之命同與宋濂為總裁

官吳伯宗等為纂修官逾年大明日曆成自起兵臨濠至洪武六年征伐次第禮樂刑政羣臣功過四裔朝貢之類共一百卷藏之金匱副在祕書監同等又言日曆祕天府人不得見請訪唐貞觀政要分輯聖政宣示天下帝從之同等乃分四十類自敬天至制蠻夷凡五卷名曰皇明寶訓嗣後凡有政績史官日記錄之隨類增入焉七年賜勅致仕語極褒美後復起承旨卒同以文章結主知應制占對靡弗敏瞻帝嘗言文章宜明白顯易通達術達時務無取浮薄同所為多稱旨而操行特耿介故至老眷注不衰福王時追贈禮部左侍郎諡文憲

朱升

按明外史朱升傳升字允升休寧人少師同里陳樸後往學于九江黃澤歸讀書紫陽祠中舉元鄉薦為池州學正講授有法學者雲集斬黃盜起退隱石門覃思著書數避兵遁竄卒未嘗一日廢太祖下徽州以鄧愈薦召問時務升對曰高築牆廣積糧緩稱王太祖善之遂參密議典禮章程悉預裁畫吳元年授侍講學士知制誥同修國史以年老特免朝謁尋進學士洪武元年定宗廟時享之禮尋命與諸儒修

女誠采古賢后妃事可法者編上之封爵諸功臣制詞多升撰時稱其典核踰年請老歸卒年七十二升自幼力學至老不倦尤邃經學嘗曰先儒作傳注求以明經也俗學皆雜誦經注使經文斷裂旨趣不融乃作諸經旁注離觀則逐字為訓合誦則條達成章辭約義精學者稱楓林先生

劉仲質

按明外史劉仲質傳仲質字文質分宜人洪武初為宜春縣訓導被薦入京奏對稱旨擢翰林典籍奉命校正春秋本末十五年拜禮部尚書帝以天下郡縣並建孔子廟而祀止京師典禮未備命仲質議之仲質乃與儒臣奏定釋奠禮儀頒行天下學校每歲春秋仲月通祀孔子如儀時國子學新成帝將行釋菜侍臣有言孔子雖聖人臣也禮宜一奠再拜帝曰孔子明道德以教後世其可以職位論耶昔周太祖如孔子廟將拜左右曰孔子陪臣不宜拜周太祖曰孔子百世帝王之師何敢不拜遂再拜今朕有天下敬禮百神於先師禮宜加尊崇乃命仲質詳議仲質請

帝服皮弁執圭詣先師位前再拜獻爵又再拜退易

服乃詣彝倫堂命講庶典禮隆重稱陛下之意詔曰可又立學規十二條合欽定九條頒賜師生又奉命碩劉向說苑新序於天下學校令生員講讀是年冬改革蓋殿大學士帝親製詰文賜之坐事貶御史後以年老致仕仲質為人厚重篤實博通經史文體典雅確不尚浮藻常當帝意焉

魏觀

按明外史魏觀傳觀字杞山蒲圻人元季隱居蒲山太祖下武昌聘授平江州學正遷國子助教再遷浙江按察司僉事兩淮都轉運使入為起居注命偕吳琳以幣求遺賢于四方洪武元年建大本堂命侍太子說書及授諸王經未幾命偕夏原吉詹同吳輔趙壽等分行天下訪求遺才所舉多擢用轉太常卿攷訂諸祀典稱旨改侍讀學士尋遷祭酒四年廷試與博士孫吾與修撰王俱為讀卷官得吳伯宗等坐考祀孔子禮不以時奏謫龍南縣未至召為禮部主事五年出知蘇州府建黉舍聘周南老王行徐用誠與教授貢穎之定儀節王彝高啓張羽輩訂經史徵者

耄周壽誼楊茂林文友行鄉飲酒禮課績為天下最擢四川行省參知政事以部民乞留命還蘇蘇舊治張士誠踞以為宮遷于都水行司觀以地湫隘還治舊基濬錦帆徑興水利或謂觀與既滅之基帝怒使御史張度廉其事以聞遂被誅尋悔之命致祭歸葬

劉三吾

按明外史劉三吾傳三吾茶陵人也初名峴後名如孫字三吾以字行兄耕孫壽孫皆仕元耕孫寧國路推官長槍賊陷寧國死焉壽孫常寧州學正武岡洞

僚寇常軍亦死之三吾避兵廣西行省承旨授靖江教授遷儒學副提舉明兵下廣西乃歸茶陵洪武十八年以茹瑺薦召至年七十二奏對稱旨授左贊善累遷翰林學士時天下初平典章闕略帝銳意制作而宿儒凋謝得三吾晚悅之一切禮制及三場取士法多所刊定三吾博學善屬文帝製大誥命三吾序洪範注成亦命序勅修省躬錄書傳會選寰宇通志禮制集要諸書皆總其事書成賜資甚厚帝嘗曰朕觀天象奎壁間嘗有黑氣今消矣文運其興乎卿等宜有所述作以稱朕意于是帝製詩時令屬和嘗賜以朝鮮玳瑁筆朝參命列侍衛前燕享賜坐殿中與汪獻朱善稱三老而禮遇尤重二十三年授晉世子經吏部劾其怠職降國子博士未幾復學士皇太子薨帝御東閣門召羣臣曰朕老矣太子不幸至此古云國有長君社稷之福燕王英武以朕立之何如三吾進曰皇孫年富世適之子子歿孫承適統禮也即立燕王置秦晉二王何地帝不答大哭而罷皇太孫之立三吾有力焉三吾為人慷慨不設城府自號坦坦翁至臨大節屹然不可奪戶部尚書趙勉者三吾壻也坐賊死三吾引退許之未幾又復學士三十年借紀善白信蹈等主考會試榜發泰和朱琮第一北士無預者琮善易學登第官檢討愀然語人曰翰苑當有厄吾其竄乎既而諸生上言三吾等南人私其鄉帝怒命侍講張信等覆閱不稱旨有言信等故以陋卷呈由三吾等屬之也帝益怒信蹈等論死三吾以老戍邊琮亦遣戍帝親賜策問更試擢六十一人皆北士時謂之南北榜又曰春夏榜云建文初三

吾召還卒琮末樂初赦還起刑部檢校鄉人楊士奇輩貴顯琮無所攀援宣德中以檢討掌助教事卒之前預尅死期或叩以休咎不應

朱善

按明外史朱善傳善字備萬豐城人九歲通經史大義能屬文元末兵亂隱山中著詩經解願史輯事繼母以孝聞洪武初為南昌教授八年對廷試第一授翰林院修撰奏對失旨謫遼東教授未至放還鄉召為翰林待詔上疏論婚姻律曰民間姑舅子若女及兩姨子若女法不得為婚仇家詆訟或已聘見絕或既婚復離或成婚有年兒女成行有司還奪按舊律尊長卑幼相與為婚者有禁若謂母之姊妹與己之身是為姑舅兩姨不可以卑幼上匹尊屬姑舅兩姨子女無尊卑之嫌成周時王朝所與為婚者不過齊宋陳杞稱異姓大國曰伯舅小國曰叔舅其世為婚姻可知列國齊宋魯秦晉亦各自為甥舅之國後世晉王謝唐崔盧潘楊之睦朱陳之好皆世為婚媾溫嶠以舅子娶姑女呂榮公母申國夫人姊也今江浙此事尤待制夫人即榮公母申國夫人姊也今江浙此事尤多以致訟獄煩輿顯下羣臣議弛其禁帝是之十八年擢文淵閣大學士論說多稱旨嘗講家人卦心箴帝大悅未幾請告歸卒年七十二卒之前有星如虹墜其舍正德中諡文恪

張以寧

按明外史張以寧傳以寧字志道古田人父一清元福建江西行省參知政事以寧年八歲或詆其伯父於縣繫獄因詣縣伸理尹異之命賦琴堂詩立就伯

父得釋以寧用是知名泰定中以春秋舉進士由黃巖判官進六合尹坐事免官滯留江淮者十年順帝徵為國子助教累至翰林侍讀學士知制誥在朝宿儒虞集歐陽元揭傒斯黃潛之屬相繼物故以寧有俊才博學強記擅名於時人呼小張學士明師取元都與危素等偕赴京奏對稱旨復授侍講學士特被寵遇帝嘗登鍾山以寧與朱升秦裕伯等扈從擁翠亭給筆札賦詩洪武二年秋奉命使安南封其主陳日燦為國王御製詩一章遣之甫抵境而日燦卒國人乞以印詔授其世子以寧不聽畱居洱江上諭世子告哀於朝且請襲爵既得命俟後使者林唐臣至然後入境將事事竣教世子服三年喪令其國人效中國行頓首稽首禮安南大悅天子聞而嘉之賜璽書比諸陸賈馬援再賜御製詩八章及還道卒詔有司歸其柩所在致祭以寧為人潔清不營財產奉使往還襁被外無他物本以春秋致高第故所學尤專春秋多所自得謨胡傳辨疑最精博惟春王正月考未就寓安南踰半歲始卒業閱月病革竟死元故官來京者素及以寧名尤重素長於史以寧長於經素宋元史彙俱失傳而以寧春秋學遂行家古田翠屏山下學者稱翠屏先生

石光霽

按明外史張以寧傳石光霽字仲濂泰州人讀書五行俱下洪武十三年以明經舉授國子學正進博士作春秋鉤元能傳以寧之學

趙假

按明外史趙假傳假字本初山陰人元進士洪武六